

交誼典第十四卷

朋友部藝文二

詩

小雅伐木三章

此燕朋友故舊之樂歌

伐木丁丁鳥鳴嚶嚶出自幽谷遷于喬木嚶其鳴矣求其友聲相彼鳥矣猶求友聲矧伊人矣不求友生神之聽之終和且平

興也

伐木許許醺酒有藇既有肥羜以速諸父寧適不來微我弗顧於

粲灑埽陳饋八簋既有肥牡以速諸舅寧適不來微我有咎 伐木于阪醺酒有衍籩豆有踐兄弟無遠民之失德乾餱以愆有酒醑我無酒酤我坎坎鼓我蹲蹲舞我迨我暇矣飲此湑矣

谷風三章

此朋友相怨之詩

習習谷風維風及雨將恐將懼維予與女將安將樂女轉棄予

興也

習習谷風維風及頽將恐將

懼寘予于懷將安將樂棄予如遺

習習谷風維山崔嵬無草不死無木不萎忘我大德思我小怨

越謠歌

風土記曰越俗性率朴初與人交有禮封土壇祭以犬雞祝曰

君乘車我帶笠他日相逢下車揖君擔簦我跨馬他日相逢爲君下

河上歌

吳越春秋曰楚白喜奔吳吳王闔閭以爲大夫與謀國事吳大夫被離問子胥曰何見而信喜子
胥曰吾之怨與喜同子不聞河上歌乎

同病相憐同憂相掇驚翔之鳥相隨而集瀨下之水因復俱流胡馬望北風而立越燕向日而熙誰
不愛其所近悲其所思者乎

雜詩二首

晉張華

逍遙游春宮容與淥池阿白蘋開素葉朱草茂丹華微風搖蕳若層波動菱荷榮彩曜中林流馨入
綺羅王孫遊不歸修路邈以遐誰與玩遺芳佇立獨咨嗟 桂萼日月運寒暑忽流易同好逝不存
迢迢遠離析房櫳自來風戶庭無行迹兼葭生牀下蛛蝥網四壁懷思豈不隆感物重鬱積遊鴈比

翼翔歸鴻知接翻來哉彼君子無愁徒自隔

擬庭中有奇樹

陸機

歡友蘭時往迢迢匿音微虞淵引絕景四節逝若飛芳草久已茂佳人竟不歸躑躅遵林渚惠風入我懷感物戀所歡采此欲貽誰

擬明月皎夜光

前人

歲暮涼風發昊天肅明明招搖西北指天漢東南傾朗月照閒房蟋蟀吟戶庭翻翻歸鴈集嘒嘒寒蟬鳴疇昔同宴友翰飛戾高冥服美改聲聽居愉遺舊情織女無機杼大梁不架楹

思友人詩

曹攄

密雲翳陽景霖潦淹庭除嚴霜彫翠草寒風振纖枯凜凜天氣清落落卉木疎感時歌蟋蟀思賢詠白駒情隨元陰滯心與迴颺俱思心何所懷懷我歐陽子精義測神奧清機發妙理自我別旬朔微言絕于耳褰裳不足難清揚未可俟延首出階檐佇立增想似

贈摯仲治詩

杜育

之子于歸言秣其駒矧乃斯人乃邁乃徂雖非顯甫餞彼百壺雖非張仲將膾河魚人亦有言貴在同音雖曰翻飛曾未異林顧戀同枝增其慨心望爾不遐無金玉音

答龐參軍

六首

陶潛

龐爲衛軍參軍從江陵使上都過潯陽見贈

衡門之下有琴有書載彈載詠爰得我娛豈無他好樂是幽居朝爲灌園夕偃蓬廬 人之所寶尙或未珍不有同好云胡以親我求良友實覲懷人懽心孔洽棟宇唯鄰 伊余懷人欣德孜孜我有旨酒與汝樂之乃陳好言乃著新詩一日不見如何不思 嘉遊未敦誓將離分送爾于路銜觴無欣依依舊楚邈邈西雲之子之遠良話曷聞 昔我云別倉庚載鳴今也遇之雪霰飄零大藩有命作使上京豈忘宴安王事靡盬 慘慘寒日肅肅其風翩彼方舟容裔江中勛哉征人在始思終敬茲良辰以保爾躬

云周續之祖企謝景夷三郎

前人

負痾頽簷下終日無一欣藥石有時閒念我意中人相去不尋常道路邈何因周生述孔業祖謝響

然臻道喪向千載今朝復斯聞馬隊非講肆校書亦已勤老夫有所愛思與爾爲鄰願言誨諸子從我潁水濱

憶費昶

梁吳均

皎皎日將上獵獵起微風山沒清波內帆在浮雲中直趣珠星北斜開碧海東故人若思我當念離根蓬

迎柳吳興道中

前人

團團日西靡客念已蹉跎長風倒危葉輕練網寒波白雲光彩麗青松意氣多所言飽恩德忘我北山蘿

傷友

前人

可憐桂樹枝懷芳君不知摧折寒山裏遂死無人窺

從主移西州寓直齋內霖雨不晴懷郡中遊聚

何遜

寓直慚虎賁沈迷豈職事祈祈寒枝動濛濛秋雨駛不見眼中人空想山南寺雙桐傍欄上長楊夾

門植夙昔構良遊接膝同懽志東西忽爲阻向隅懷獨思颯颯履聲喧擾擾羣分異臥聞復雷響坐視重局祕欲寄一行書何解三秋意

寓居公廨懷何秀才

高爽

寄止鄰城闕徒然失遊聚臥聞雜沓路坐對空寂宇風扉乍開閣粉蝶時翻舞若人不在茲煩憂何得愈

贈陰梁州

荀濟

梁州刺史陰子春左遷濟作大詩贈之文傳時俗或稱于帝者帝曰箇人雖有才亂俗好反不可用濟以不得志常懷悵悵二十餘載後以論佛法奔魏

副尉西域返伏波南海還坎壈多構難鬱悒少騰遷孰云功未立寧是契不全直爲逢迎寡良由聽受偏若人本高絕芬馥邁蘭茝驅車趨折坂匡坐酌涼泉洗幘豈虛唱席皮良信然羣醉嫉孤醒衆媿恐獨妍龍旗翻委鬱鍋軸更迴還跼勢終橫海鵬力會冲天昔余遇知己一面深千祀紆人重結襪辱德逾過市詩酒悅風雲琴歌賞桃李淹留漢水曲契闊渝川涖結綬惟貢公推名實鮑子徒然

懷伏劍終無報國士高懷不可忘劍意何能已已作金蘭契何言雲雨別咄嗟改容鬢俄頃彌年歲
海曲窮地表江源渺天際雲泥已殊路暄涼詎同節柳絮亟如絲梅花屢成雪月落桂陰遠風起萱
條結鶴舞想低昂鵬絃夢清切聞君戍靈關瓜時猶未還數汎明月沼頻遊向日灣金碧應髣髴輪
鏡幾登攀復承西歸後將兵出湖口經過道路長往來日月久玉體何容歇金漿故應有陽臺可譙
私章華堪置酒旣彈趙人瑟復擊秦人缶缶瑟多奇調秦趙饒姝妙得意在雙眸傾城猶一笑伯喈
恩實早十桂天終少歿等盛姬傷存同魏車照君子篤久要宿昔盛賓僚依依集鱗羽眷眷共枝條
一朝限岐路萬里異波潮容儀雖眇眇夢想尙昭昭新人不相識故人詎相憶杳杳問山川迢迢阻
音息各附青雲遠詎假排虛力風月接歡宴酒醴承顏色安知慕儔者潏潏涕沾軾僕本不平人悲
愁眉亦嘖年來空自老歲去不知春未能全體命于中欲問津五噫如適越十上似遊秦肌膚積霜
露膂力倦風塵烏裘日日故白髮朝朝新人生感意氣相知無富貴懷趙寶廉頗思燕唯樂毅大選
咆咻士廣募嫖姚尉映月比刀環瞻星看劍氣郢路一迢遠長楸幾歔歔渤海水尙寬崦嵫日猶未
丈夫志四海兒女多辭費待余濟濁河從君宿清渭

寄徐陵

北周庾信

故人倘思我及此平生時
莫待山陽路空聞吹笛悲

寄王琳

前人

玉關道路遠金陵信使疎
獨下千行淚開君萬里書

贈薛播州十四首

隋楊素

北史曰素嘗以五言詩七
百字贈播州刺史薛道衡
詞氣穎拔風韻秀上爲一
時盛作未幾而卒
道衡曰人之將死其言也
善若是乎

在昔天地閉品物屬屯蒙
和平替王道哀怨結人風
麟傷世已季龍戰道將窮
亂流飛海若貫日引長虹
干戈異革命揖讓非至公
兩河定寶鼎八水域神州
函關絕無路京洛化爲丘
漳滏爾連沼涇渭余別流
生郊滿戎馬涉路起風牛
班荆疑莫遇贈編竟無由
五緯連珠聚千載濁河清
金亡潛虎質閭盡自蛙聲
聖期伊旦暮天祿啟炎精
霧生三日重星飛五老輕
禪宗答上帝改物創羣生
道昏雖已朗政故猶未新
剡舟洹水濟結網大川濱
出遊迎釣叟入夢訪幽人
植林雖各樹開榮豈

異春相逢一時泰共幸百年身 有帛責丘園生芻自幽谷塵芳金馬路瀾清鳳池澳零露旣垂光
清風復流穆傾蓋如舊知彈冠豈新沐利心金各斷芬言蘭共馥 自余歷端揆緝熙厯時彥及爾
陪帷幄出納先天睠高調發清音縹藻流餘絢或如彼金石歲暮無凋變余松待爾心爾筠留我箭
荏苒積歲時契闊同遊處閭閻旣趨朝承明還宴語上林陪羽獵甘泉待清曙迎風含暑氣飛雨淒
寒序相顧惜光陰留情共延佇 滔滔彼江漢實爲南國紀作牧求明德若人應斯美高臥未褰帷
飛聲已千里還望白雲天日暮秋風起峴山君儻遊淚落應無已 漢陰政已成嶺表人猶蠹彈冠
比方新還珠總如故楚人結去思越俗歌來暮陽鳥尙歸飛別鶴還迴顧君見南枝巢應思北風路
北風吹故林秋聲不可聽鴈飛窮海寒鶴唳霜臯淨含毫心未傳聞音路猶夏唯有孤城月徘徊獨
臨映弔影余自憐安知我疲病 養病願歸閒居榮在知足棲遲茂陵下優游滄海曲古人情可見
今人遵路躅荒居接野窮心物俱非俗桂樹芳叢生山幽竟何欲 所欲棲一枝稟分豐諸己園樹
避鳴蟬山梁遇雌雉野陰冒叢灌幽氣含蘭芷悲哉暮秋別春草復萋矣鳴琴久不聞屬聽空流水
秋水魚遊日春樹鳥鳴時濠梁暮共往幽谷有相思千里悲無駕一見杳難期山河散瓊蕊庭樹下

丹滋物華不相待歲暮有餘悲
銜悲向南浦寒色黯沈沈
風起洞庭險烟生雲夢深
獨飛時幕侶
寡和乍孤音木落悲時暮
時暮感離心離心多苦調
詎假雍門琴

秋日贈王中舍

虞世基

秦關望吳苑渭渙去江濱
天漢星躔絕山川地角分
百年變朝市千里異風雲
雙鷺難可贈別鶴不相聞
忽值從遊士玳簪光素履
歡言悅鄭郊雪泣悲燕市
契闊論談笑殷勤訪生死
思君在一方無由同四美
尺素乃云披投瓊慰久離
雲開綉錦散霞照綠綈披
相思歎河廣相望阻天垂
贈言方杜若握手代萱枝
伊昔風期早金蘭信爲寶
去來金馬門留連闕難道
鸞嶺訪三禪商山追四皓
勝地俱遊息披文遞論討
虛薄忝官聯喬木遂同遷
濯纓升博望闊步入崇賢
高軒照流水長劍聳秋蓮
南風忽不競東海遂成田
喧喧狹斜路隱隱平陵樹
鳳闕曖西臨星橋耿南注
五方多異俗四海皆行路
士衡嗟苦辛德璉傷流寓
鞏洛重行行寓目盡傷情
太行臨北絳函谷拒西京
雀書圖久滅龍文鼎遂輕
凌雲餘構盡濛汜曲池傾
徘徊殊未極惆悵空雲纓
伊川忽會面留連展言宴
東西一背飛翻然成異縣
哀哉人道促痛矣嗟埋玉
稽生顧影琴裴子飄風燭
摧茲激水意頓此浮雲足
棄置

勿重陳難終唯此曲漢陽趙元淑薛縣雍門周清文寧解病妙曲反增愁翳神逾伏懷懷歲方邁
雙嶠飛暗雨八水凍寒流蘭枯芳草歇槐古憶前秋江干不可望徒此歎離憂

寒夜思友

二首

唐王勃

雲間征思斷月下歸愁切鴻鴈西南飛如何故人別
朝朝翠山下夜夜蒼江曲復此遙相思清尊
湛芳綠

贈祖三詠

王維

蟪蛄挂虛牖蟋蟀鳴前除歲晏涼風至君子復何如高館閨無人離居不可道閒門寂已閉落日照
秋草雖有近音信千里阻河關中復客汝潁去年歸舊山結交二十載不得一日展貧病子旣深契
闊余不淺仲秋雖未歸暮秋以爲期良會詎幾日終自長相思

傷懷贈故人

孟雲卿

稍稍晨鳥翔淅淅草上霜人生早罹苦壽命恐不長二十學已成三十名不彰豈無同門友貴賤易
中腸驅馬行萬里悠悠過帝鄉幸因絃歌未得上君子堂衆樂互喧奏獨予備笙簧坐中無知音安

古今圖書集成
得神揚揚願因高風起上感白日光

以詩代書答元丹丘

李白

青鳥海上來今朝發何處口銜雲錦書與我忽飛去鳥去凌紫烟書留綺窗前開緘方一笑乃是故人傳故人深相助憶我勞心曲離居在咸陽三見秦草綠置書雙袂間引領不暫閒長望杳難見浮雲橫遠山

讀諸葛武侯傳書懷贈崔少府叔封昆季

前人

漢道昔云季羣英方戰爭霸圖各未立割據資豪英赤伏起顏運臥龍得孔明當其南陽時隴畝躬自耕魚水三顧合風雲四海生武侯立岷蜀壯志吞咸京何人先見許但有崔州平余亦草間人頗懷拯物情晚途值子玉華髮同衰榮託意在經濟結交爲弟兄母令管與鮑千載獨知名

淮陰書懷寄懷寄王宗城

前人

沙墩至梁苑二十五長亭大舶夾雙櫓中流鵝鶴鳴雲天掃空碧川嶽涵餘清飛鳧從西來適與佳興并嘗言王喬舄婉變故人情復此親懿會而增交道榮沿洄且不定飄忽悵徂征暝投淮陰宿欣

得漂母迎斗酒烹黃雞一餐感素誠予爲楚壯士不是魯諸生有德必報之千金恥爲輕緬書羈孤意達寄棹歌聲

重憶賀監

前人

欲向江東去定將誰舉杯稽山無賀老却棹酒船迴

相逢行

韋應物

二十登漢朝英聲邁今古適從東方來又欲謁明主猶酣新豐酒尙帶灞陵雨邂逅兩相逢別來問寒暑寧知白日晚暫向花間語忽聞長樂鐘走馬東西去

城中臥疾知閻薛二子屢從邑令飲因以贈之

前人

車馬日蕭蕭胡不枉我廬方來從令飲臥病獨何如秋風起漢臯開戶望平蕪卽此稀音素焉知中密疎渴者不思火寒者不求水人生羈寓時去就當如此猶希心異跡眷眷存終始

暮相思

前人

朝出自不還暮歸花盡發豈無終日會惜此花間月空館忽相思微鐘坐來歇

春中憶元二

前人

雨歇萬井春柔條已含綠徘徊洛陽陌惆悵杜陵曲遊絲正高下啼鳥還斷續有酒今不同思君瑩如玉

夏夜憶盧嵩

前人

藹藹高館暮開軒滌煩襟不知湘雨來瀟灑在幽林炎月得涼夜芳樽誰與斟故人南北居累月間微音人生無閑日歡會當在今反側候天旦層城苦沈沈

酬盧嵩秋夜見寄

前人

喬木生夜涼月華滿前墀去君咫尺地勞君千里思素秉栖遁志況貽招隱詩坐見林木榮願赴滄洲期何能待歲晏攜手當此時

答李博士

前人

休沐去人遠高齋出林杪晴山多碧峯顯氣凝秋曉端居喜良友枉使千里路緘書當夏時開緘時已度簷籬已飄颻荷露方蕭颯夢達竹窗幽行稀蘭徑合舊居共南北往來只如昨問君今爲誰日

夕度清洛

長安遇馮著

前人

客從東方來衣上灞陵雨問客何爲來采山因買斧冥冥花正開颺颺燕新乳昨別今已春髮絲生幾縷

期盧嵩枉書稱日暮無車馬不赴以詩答

前人

佳期不可失終願枉衡門南陌人猶度西林日未昏庭前空倚杖花裏獨留樽莫道無來駕知君有短轅

淮上喜會梁州故人

前人

江漢曾爲客相逢每醉還浮雲一別後流水十年間歡笑情如舊蕭疎鬢已斑何因不歸去淮上有秋山

贈李白

杜甫

二年客東都所歷厭機巧野人對羶腥蔬食常不飽豈無青精飯使我顏色好苦乏大藥資山林跡

如掃李侯金閨彥脫身事幽討亦有梁宋遊相期拾瑤草

夢李白 二首

前人

死別已吞聲生別常惻惻江南瘴癘地逐客無消息故人入我夢明我長相憶恐非平生魂路遠不可惻魂來楓林青魂返關塞黑君今在羅網何以有羽翼落月滿屋梁猶疑照顏色水深波浪闊無使蛟龍得浮雲終日行遊子久不至三夜頻夢君情親見君意告歸常局促苦道來不易江湖多風波舟楫恐失墜出門搔白首苦負平生志冠蓋滿京華斯人獨顛顚孰云網恢恢將老身反累千秋萬歲名寂寞身後事

寄岑嘉州

前人

不見故人十年餘不道故人無素書願逢顏色關塞遠豈意出守江城居外江三峽且相接斗酒新詩終自疎謝朓每篇堪諷誦馮唐已老聽吹噓泊船秋夜經春草伏枕青楓限玉除眼前所寄選何物贈子雲安雙鯉魚

寄韓諫議注

前人